

皇明兩朝疏抄

皇明兩朝疏抄卷之八

邪違類

直言天下第一事疏

海瑞

臣聞君者天下臣民萬物之主也惟其爲天下臣民萬物之主責任至重凡民生利病一有所不宜將有所不稱其任是故養君之道宜無不備而以其責寄臣工使之盡言焉臣工盡言而君道斯稱矣昔之務爲容悅阿諛曲從致使災禍隔塞主上不聞焉無足言矣過爲計者則又曰君子危明王憂治世夫世則治矣以不治憂之主則明矣以不明危之無乃使之反求眩瞀莫決趨舍矣

乎非迫論也臣受國厚恩矣請執有犯無隱之義美曰
美不一毫虛美過曰過不一毫諱過不爲悅諛不暇過計
謹披瀝肝膽爲陛下言之漢賈誼陳政事於文帝曰進
言者皆曰天下以安以治矣臣獨以爲未也安且治者非
愚則諛夫文帝漢賢君也賈誼非苛責備也文帝性仁頗
柔慈恕恭儉能有近民之美優游退遜尚多怠廢之政不
究其弊所不免樂以安且治當之愚也不究其才所不能
樂以政之安且治頌之諛也陛下自視于漢文帝何如
陛下天資英斷睿識絕人可爲堯舜可爲禹湯文武下之
如漢宣之勵精光武之大度唐太宗之英武無敵憲宗之

志平僭亂宋仁宗之仁恕舉一節可取者 陛下優為之
即位初年剷除積弊煥然與天下更始舉其大槩箴敬一
以養心定冠履以辨分除聖賢土木之像奪宦官內外之
權元世祖毀不與祀祀孔子推及所生天下忻忻然以大
有所為仰之識者謂輔相得人太平指日可期也非虛語
也高漢文帝遠甚然文帝能充其仁恕之性節用愛人呂
祖謙稱其不盡人之財清是也一時天下雖未可盡以治
安予之然貫朽粟陳民多康阜三代之後皆稱賢君焉
陛下則銳精未久安念牽之而去矣反剛明而錯用之謂
遜與可得一意玄修富有四海不曰民之脂膏在是也而

脩興土木二十餘年不視朝繼法紀弛矣數行推廣事例名節濫矣二王不相見人以為薄於父子以猜疑誹謗戮辱臣下人以為薄於君臣樂西死而不返宮人以為薄於夫婦天下吏貪民不聊生水旱靡時盜賊滋熾自陛下登極初年亦有之而未甚也今賦役煩增萬方則效陛下破產禮佛日甚室如懸磬十餘年米天下極矣天下因即陛下改元之號而臆之曰嘉靖者言家家皆淨而無財用也邇者嚴嵩罷相世蕃極刑差快人意一時稱清時焉然嚴嵩罷相之後猶之嚴嵩未相之先而已非大清明世界也不及漢文帝遠甚天下之人不直陛下久矣

內外臣工之所知也知之而諱詆詩云來職有闕惟仲山
甫補之今日所賴以弼棊匡救格非以歸正諸臣責也夫
聖人豈絕無過舉哉古者謗謔亮采惠疇足矣不必責之
以諫保氏掌諫王惡不必諷之也木繩金礦聖賢不必言
之也乃修齋建醮相率進香天杙天藥相率表賀建興宮
室工部極力經營取香覓寶戶部差求四出陛下誤舉
諸臣誤順無一人為陛下正言焉都俞吁咈之風陳善
閉邪之義邈無聞矣諛之甚也然愧心餒氣退有後言以
從陛下昧沒本心以歌頌陛下欺君之罪何如夫天
下者陛下之家也人未有不顧其家者內外臣工有官

守有言責皆所以冀 陛下之家而磐石之也一意玄修
是 陛下之心惑也過於苛斷是 陛下之情偏也而謂
陛下不顧其家人情乎諸臣顧身念重得一官多以欺敗
不事事敗有不足以當 陛下之心者其不然者 君心
臣心偶不相值也遂謂 陛下為賤薄臣工諸臣正心之
學微所言或下免已私或失詳審誠如胡寅捩亂政事之
說有不足以當 陛下之心者其不然者 君意臣意偶
不相值也遂謂 陛下為是已拒諫執 陛下一二事不
當之形跡憶 陛下千百事之盡然哉 陛下誤終不釋
諸臣欺 君之罪大矣記曰上人疑則百姓惑下難知則

君長勞今日之謂也為身家心與懼心合臣職不明臣以
一二事形跡既為諸臣解之矣求長生心與惑心合有辭
關于臣君道之不正臣請再為 陛下開之 陛下之誤
多矣大端在修醮修醮所以求長生也自古聖賢止說修
身立命止說順受其正蓋天地賦予千人而為性命者此
盡之矣堯舜禹湯文武之君聖之極也未能久世不終下
之亦未見方外士自漢唐宋存至今日使 陛下得以訪
其術者陶仲文 陛下以師呼之仲文則既死矣仲文尚
不能長生而 陛下獨何求之至為天賜仙桃樂凡怪妄
尤甚伏羲氏王天下龍馬出河因則其文以畫八卦禹治

水時神龜負文而列其背因而第之以成九疇河圖洛書
實有此瑞以洩此萬古不傳之秘天不愛道而顯之聖人
藉聖人以開示天下猶之日月星辰之布列而曆數成焉
非虛妄也宋真宗獲天書於乾祐山孫奭諫曰天何言哉
豈有書也桃必採而後得樂由人工鳩以成者也茲無因
而至桃樂是有是而行耶天賜之者有手執而付之耶
陛下玄修多年矣一無所得至今日左右奸人逆 陛下
玄修妄念區區桃樂之長生理之所無而玄修之無益可
知矣 陛下又將謂懸刑賞以督率臣下分理有人天下
無不可治而玄修無害矣乎夫人幼而學既無效君澤民

異士之學壯而行亦無致君澤民殊用之心太甲曰有言
逆於汝心必求諸道有言遜於汝志必求諸非道言順者
之未必為道也即近觀嚴嵩有一不順陛下者乎昔為
竊竊今為逆本梁材守道守官陛下以為逆者也歷任
百聲官戶部者至今日首稱之雖近日嚴嵩沒百官有
惕心焉無用於積賄求遷積自洗滌然嚴嵩罷相之後猶
有嚴嵩未相之先而已諸臣寧為嚴嵩之順不為梁材之
順甚者貪求未甚者族日見稱於人者亦以願願山林
之樂為樂實係違尚舉故事案已格物任天下重使社
稷長終必賴之未見其人焉得非有所牽制其心未能

純然精白使然乎 陛下欲諸臣惟予行而莫違也而責之以效忠付之以翼為明聽也又欲其順乎玄修土木之誤是股肱耳目不為腹心衛也而自為視聽持行之用有臣如儀行焉可以成得志與民山之之業無是理也

陛下誠知玄脩無益臣之改行民之效尤天下之安與不安治與不治由之翻然悟悔日視正朝輔宰九卿侍從言官講求天下利害洗數十年道君之誤置其身于堯舜禹湯文武之上使其臣亦得洗數十年阿君之耻置其身于臯陶伊傅之列相為後前明良喜起都俞吁咈內之宦官宮妾外之光祿寺厨役錦衣衛恩廕諸衛門帶俸舉凡無

事而官者亦多矣上之內厨內庫下之戶工部諸廠藏殿
絹糧料珠寶器用木材諸物多而積手無用用之非所宜
用亦多矣諸臣必有為 陛下言者諸臣言之 陛下行
之此則在 陛下一節省間而已京師之一金田野之百
金也一節省而國有餘用民有蓋藏不知其幾也而

陛下何不為之官有職掌先年職守之正職守之全而未
行之今日職守之廢職守之苟且因循不認真不盡法而
自以為是敦本行以端士習止上納以清士途久任吏將
以責成功練選軍士以充召募驅縑黃遊食使歸四民責
府州縣兼舉富教使成禮俗復屯塩本色以裕邊儲均田

賦丁差以蘇散舉天下官之侵漁將之怯懦吏之為奸刑
之無少姑息焉必世之仁博厚高明悠遠之業諸臣必有
為 陛下言者諸臣言之 陛下行之此則在 陛下一
振作間而已一振作而諸廢具舉百弊剋絕唐虞三代之
治粲然復興矣而 陛下何不為之節省之振作之又非
有所勞於 陛下也九卿總其綱百職分其任諸撫按科
道糾舉肅清之于其間 陛下持其大綱稽治要而責成
焉勞於求賢逸於任人如天運乎上而四時六氣各得其
序恭已無為之道也天地萬物為一體固有之性也民物
熙皞薰為太和而 陛下性分中自有真樂矣可以贊天

之化育則可以與天地參道隨天通命由我立而

陛下性分中自有真壽矣此理之所有可旋至而立效者也若夫服食不終之藥遙興輟舉理之所無者也理之所無而切切然散爵祿竦精神玄修求之懸思鑒相繫風捕影終其身如斯而已矣其可乎君道不正臣職不明此天下第一事也于此不言更復何言大臣持祿而外為諛小臣畏罪而面為順陛下有不得而知而改之行之者臣每恨焉是以昧死竭忠惓惓為陛下言之一反情易向之間而天下治與不治民物之安與不安係決焉伏惟陛下留神宗廟幸甚天下幸甚

停止 欽取銀兩以裕 國計疏

李春芳

昨者恭覲 聖諭欽取戶部銀三十萬兩隨該戶部奏稱
邊費重大 國用不足欲乞 聖明停止取用等因奉

御批已有旨了臣等看得 祖宗朝國用邊餉俱有定額
各處庫藏尚不贏餘自嘉靖二十九年虜犯 京師之後
邊費日增各處添兵添馬修堡修城年例犒賞之費比之
先朝數幾百倍奏計求請殆無虛日加以連年水旱災傷
百姓徵納不前庫藏搜括已盡臣等備查 御覽揭帖計
每歲所入折色錢糧及監課贖事例等項銀兩不過二
百五十餘萬而一歲支放之數乃至四百餘萬每年尚少

銀一百五十餘萬無從措處生民之膏血已罄 國家之
費出無經臣等日夜憂惶計無所出方與該部計議設處
支持日前尚恐不給若又將前項銀兩取供 上用則積
貯愈虛用度愈缺一旦或有飢荒盜賊之事何以應之該
部所以懇切具奏誠事勢窮蹙有萬不得已者也仰惟
皇上嗣登大寶屢 下寬恤之詔 躬行節儉以先天下
海內訢訢方幸更生頃者以來買辦漸多用度漸廣此缺
乏之際臣等實切隱憂輒敢不避煩瀆披瀝上 請伏願
皇上俯從該部之言將前項銀兩先行取進仍望 念國
儲之日乏 懷儉德之永圖 節賞賚以省財用 俾實

辦以寬民力如上供之費有必不可已者照祖宗舊
制止於內庫取用至於該部所儲專以備軍國重大之
費庶國用可以漸裕而民力可以少甦也

陳愚惘以附餘忠疏

林俊

臣待盡海濱尋中風疾手足不仁口眼失位遂就醫藥備
後事繼聞有西北之報漕輓供億愁煩 聖憂臣受知

四朝叙復起廢者屢屢竟無能久于位以宣有微勞 陛
下新政之召臣衰以老矣又無能久于其位力乞休致顧
蒙 賜勅給役給廩歲時存問臣疏辭未允強顏登受臣
今氣息奄奄安望久居人世者哉臣自按察使乞歸已無
起望附虛壙臣父墓之傍備納蛇馬前項致仕 恩典及
身後塋祭通乞停免以為臣存歿之安臣又做古人遺直
遺表之義僭有獻焉夫議禮如訟見各不同包而容之德

之大也若粉墨大辨恐未足以服其心臣伏讀 明詔仰見 天地之大日月之明於斯有悔焉存卹叙復日候而久未聞也昔成湯改過不吝 陛下儼德堯舜於湯何有哉伏望 蚤降溫旨以荅幽明慰人望臣又聞古者撻人於朝與衆辱之而已非必欲壞爛其體膚而致之死也亦非所以待士夫也成化時臣及見廷撻三五臣容厚綿底衣以重羶疊帔猶牀褥數月淤血始消正德時逆瑾用事始啓去衣之端重非 國體所宜釀有末年諫止南巡撻死之慘幸遇 新詔收卹士氣始回不謂又偶有此臣又見成化弘治間 詔獄諸 旨惟叛逆妖言強盜奸生打

着問刺虎殺人打着問其餘常犯送錦衣衛鎮撫司問鎮撫奏送法司議罪中間情重始有來說之 旨部寺覆奏始有降調之 旨今一槩打問無復低昂恐舊典失齊非祖宗仁厚之意即此一事似宜循舊臣又見去歲以來舊臣謝遣殆盡 朝野為空伏望 聖明留念既去者禮致未去者慰留與數三大臣時加延接又有碩德重望如維欽順王守仁呂柟魯鐸輩乞引自近以裨 聖德圖聖政臣舌梗意長授書難盡無任懸結愛顧之至

慰人心以隆治道疏

楊爵

臣惟人王一身萬化本原獲至尊之位膺艱大之責用人
行政是非得失方在幾微而關於民心之向背天命之去
留者即甚可畏也是以聖帝明王深察乎此制治必于未
亂詳邦必于未危事無微而不謹時無暫而不慎為大於
其細而圖難乎其易然後天人交與而可以延國祚於永
久矣方今天下大勢如人染病之極內而腹心外而百骸
莫不受病即欲拯之無措手之地以臣觀之其危亂之形
將成目前之憂甚大也大抵因仍苟且兵戎廢弛奢侈妄
費公私困竭奔競成俗賄賂通行遇災變而不憂非祥瑞

而稱賀讒譎面諛公肆欺罔士風民俗於此大壞而國之所恃以為國者掃地盡矣撥危亂而反之治安此在陛下所以轉移率勵之者何如耳况當朝觀大比之期百司多士濟濟來趨延頸思化人人切仰極重不可反幾失則難濟伏願陛下汲汲於此時留心焉以為善後之圖也臣以病居林下者八九年謨衆聖恩賜之起用權以耳目之官任以糾劾之責受命以來早夜耿耿每思國事日非而臣於國恩有未報至於痛心流涕者有之臣請畧舉目前之所見大要足以失人心而致危亂以貽聖心之憂者為陛下告誠不忍默默保位以上負

陛下之洪恩下負生平之所望也伏願 聖明垂聽焉臣
竊惟天下之患莫大於以危為安以留為利實則可憂而
以為大可樂法家拂士日益遠而快意肆情之事無敢阻
難於其間積弊而至於盛則不可得而救矣此實天下之
患也往年夏未入秋恒暘不雨畿輔千里已無秋禾既又
立冬無雪暖氣如春元旦僅雪即止民失所望洶洶無聊
憂旱之切遠近所同此正 陛下徹樂減膳率臣下以祈
惠寧之時也而在 廷之臣如大學士夏言數人者乃以
為靈瑞而稱頌之其欺天罔人不亦甚乎其不幾於安危
利害而以大可憂者為樂邪孔子告顏淵為邦在遠佞人

若是而謂之佞人者非耶大臣之職輔君當道志於仁而
先天下以為憂者也無忠亮體國之心而居人臣之極位
所謂小人而乘君子之器也欲天下之治安可得耶又如
邕國公郭勛者中外皆知其為天下之大惡 朝廷之大
蠹也勛之舉動踪跡豈能逃於 聖鑒雖 陛下盛德優
容不忍即罪 神謀遠慮自有所處臣愚以為奸不可近
惡不可長若止之于微遏之于漸則 朝廷優禮人臣之
體貌未失而勛戚之餘裔亦得以保全而善終也或使稔
惡肆毒潛干政柄則群狡赳赳善類退處其為天下國家
之禍日益深矣治道去其太甚者此其為害治之人之甚

所當急去而不可緩也凡此在庸匪人足以失人心而致
危亂者一也天生斯民立之司牧君人者奉天以安民而
使之各得其所也民不得所則其心不能無怨民心怨則
天意可知矣古者民勤於食則百作廢今民勤食不可得
而至于離散離散無所歸而至於死亡臣近巡視南城兩
月中凍餒死者八十人此一南城一廓耳共計五城未知有
幾目所不及見而在於一萬里之遠者又未知其有幾孰
非陛下之赤子也而顛連無告委命溝壑蓋望一豆羹
蔬食以延須臾之生而不可得也此正陛下愛民惜財
與天下休息之時也而土木之功十年未止此矣而尚未止

工部屬官添設者至數十員又差部官遠修雷壇以一方士之故浚民膏血而不知恤則民何以得其所哉民惟邦本本固邦寧窮民之力盡民之財是自蹙其本根也而國何以為國乎昔漢文帝惜百金之費不營一臺故海內富庶隋氏以盛修宮室而至于亡國顧陛下以為鑒戒則宇內生靈之慶也况今北虜跳梁內寇竊發警報日聞加以頻年災沴上下一空百計取之愈為不足而興作未已以結怨於天下此其足以失人心而致危亂者二也唐虞三代之世君臣每以勤敬之道交相儆戒其見於經傳者如堯舜兢兢業業無怠無荒禹惜寸陰湯坐以待旦文王

不遑暇食武王以敬而勝怠故能壽考蓋期治隆熙泰是
數聖人所以崇德益壽善政和民之道不外乎敬與勤而
已矣周公召公之相成王也周公則以逸而戒之召公則
以敬而勉之蓋敬逸之間身之修否政之理亂所由分此
固周召忠君惻懷之心也 陛下即位之初勵精有為不
遑寧處嘗以敬一箴頒示天下其於堯舜三王之道蓋已
心得之矣數年以來因 聖體違和 朝儀間缺 經筵
未講大小臣庶 朝恭辭謝未得一覩 聖容敷奏復逆
未得一聆 天語若是者今已久矣夫 天位者艱難之
器非逸樂之具也 陛下一身 天地百神賴以享六軍

萬民賴以安一日二日有萬幾之繁近聞 聖躬調順大
獲福履中外臣民罔不歡慶況此春氣漸和人思新化庶
官入 覲雖雖肅肅來自萬里之遠者孰不欲鞠躬垂委
北面舞蹈望 龍顏以慰快覲之心乎易曰聖人作而萬
物覲正今日之事也若未得瞻于咫尺 天顏之下以伸
有孚顙若之敬臣恐人心日益怠惰中外日益渙散非隆
古君臣同寅協恭以臻太平之氣象也此其足以失人心
而致危亂者三也執左道以惑眾聖王所必誅而不宥者
也今異言異服列于 庭苑金紫赤紱賞及于方外之士
臣不意 陛下廢先物明見萬里而所為一至於此夫

保傅之職坐而論道古人謂官不必備惟其人故非道隆
德盛極天下之選者不足以任此責今舉而異諸迂怪之
徒輕之棄流品之濫至此極矣且陛下以天縱之聖資
爲上天之元子若遠宗帝王之道近守祖宗之法細
施廣廈之下與公卿賢士講論治道則心正身脩與天地
合其德與日月合其明和氣致祥罔有天災則山川鬼神
莫不寧矣安用假此妖誕邪妄之術列諸法禁之地而藉
之以爲聖躬之福耶甚非聖天子所以崇正遠邪平
平蕩蕩奉三無私以化天下之道也臣聞風聲所及人起
異議豪傑之士聞而解體貽四方之笑取自世之譏於

聖德國政所損不細此其足以失人心而致危亂者四也
古人有言君聖則臣直 陛下臨御之初延訪忠謀虛懷
納諫其於狂直敢言之士徃徃矜宥故一時臣工特
陛下之能容敢以直言冒干 天聽言過激切而獲罪者
亦多有之自此以來臣下懷危慮禍未聞敢有犯顏直諫
而為匡救逆心之論者昔人論求言之益以為勉強以聽
不若悅而從之悅而從之不若導之使言蓋人臣持祿保
位者多而忘身以徇國者少雖識見有明暗言論有得失
在 陛下明目達聰鑒別取舍於黜陟賞罰付之公論則
可矣若震之以 天威加之以危禍如往年太僕寺卿楊

言出而身即死近日翰林院左贊善兼脩撰羅洪先等皆以言解斥此於國體治道所損甚多伏願聖明少致思焉成湯大聖人也仲虺稱其改過不吝從諫弗咈高宗有罔之令主也傳說告以木從繩則正后從諫則聖此二君作聖之功為萬世人主之龜鑑也臣非區區為一揚最等惜也但歷觀古今以來有天下國家者未有不以任諫而興以拒諫而亡者也今而後雖有素懷忠義之心者非灰心任進甘退在園亦必深自晦藏為保身計矣孰敢發法言以論天下之事哉臣恐忠盡柱口則讒說交進上德不能下達下情不能上通安危休戚無由以

見而堂陛之近即遠於萬里矣此其足以失人心而致
危亂者五也此數者關於天下之治亂國勢之安危貽
聖心之憂誠未已也伏望皇上念祖宗創業之艱
難思今日守成為不易察臣忠悃覽臣所陳賜之
施行戒飭夏言務篤忠貞之道以報國家崇顧禮遇之
恩於郭勛則豫有以裁抑而保全之止土木之功開諫諍
之路屏邪妄之行陛下仍以慎獨養天德以天德達王
道以慰人心以析天佑則莊敬日強而眉壽永于千億
虛靈照物而忠邪莫可遁逃其為宗廟社稷萬萬年無
疆之福聖子仲孫萬萬年無疆之祝者端在此矣

聽忠言信詔旨以防欺蔽疏

李已

近訪內

承運庫署庫事尚衣監太監崔敏等題稱急缺

年例金而寶珠等項乞令戶部買進以備關領等因隨該

臣等懇

請仍買奉 聖旨照先年例買進欽此又該戶

部又覆執奏

聖旨發銀買進金上緊催來用欽此臣等

恭捧

綸旨堅確嚴切已竊度 聖意之難回矣又知再

行陳

請必激怒 聖心禍且不測然思 君愛 國乃

臣之素志糾正封駁又臣之職掌苟少益家 國雖生死

有不計者豈敢巧為規避遂終緘默臣是以昧死再陳冒

犯鈇鉞惟

陛下其矜察焉臣等伏覩 陛下登極之詔

恭

其於金珠寶石等項停止採買而又一款有云收府各衙門供應錢糧朕加意節省用自有餘該部務查照弘治年間及嘉靖初年舊額酌量徵派其以後年分加派者盡行革除將革過數目奏知仍造冊送科備照如各衙門假以缺少為由行文加派及該部阿奉准行者科道官即時參奏治以重罪欽此夫 陛下之出此 詔旨也豈虛假以欺人耶蓋誠 留心省節加意 國儲以實心而行實政也是故 成命一頒懽騰海宇以為有 君如此太平可立致矣何數年以來左右近習干 請紛紜奸巧百出眩惑 聖聰動搖 國是遂至賈玉賈珠不一而足使

詔旨既出而輒更 成命力行而忽易美意良法徒託於
空言社鼠城狐肆然而無忌天下臣民已失其仰望之初
心矣不意又有如太監崔敏等指稱缺乏復行故智雖經
科部執奏 陛下終未 俞允夫政令者人主之大柄天
下之所取信百官之所承式蓋不可以不慎者故易曰渙
汗大號書曰令出惟行弗惟反此聖經之格言 大君所
當慎守而不易也今以 朝廷新政顧前左右夕改朝更
有如此則 陛下詔旨皆為虛文其何以示 大信於天
下乎且尚書乃 陛下親信之臣臣等亦 朝廷耳目之
寄 陛下於大臣言之不聽於言官論之不從不知外此

可信從者抑又何人臣等竊料陛下之意不過曰貴為天子富有四海雖買此珠玉所糜能幾不知抵璧投珠毀牀碎漏在古先哲王我朝聖祖行之俱有懿矩蓋曰此等玩好寒不可衣饑不可食徒為移易性情靡費財用以故棄而不惜方今國家縱使十分充實陛下猶當慎乃儉德惟懷永圖以希哲王聖祖之芳跡矧今府庫空虛矣小民困竭矣帑藏所入不足以待一年之出矣邊方年例奏發者無時省直饑荒求濟者不已司計之臣雖千方那補百計撐持尚且不給茲以一玩好之故而用數千萬之費何以區處何以借支况各處錢糧舊欠者奉

詔蠲免新派者催徵未至太倉雖有所蓄贏餘正宜存積以備經費尚可聽其不經妄用而無繼於後耶方其事

下該部大臣懍懍執奏以為不可無非省費裕國之意

而乃不蒙俞允者蓋由崔敏等獻諂希寵惟欲積財貨

以奉私求蓄詐懷奸意在假供用以充私橐以致陛下

惑於邪說而正論不從隨於奸計而忠謀不用誤國欺

君真此為甚若不及今杜漸竊恐將來效尤肆意希求轉

相欺蔽不至於空人之國不已矣臣等為陛下切憂之

伏望皇上念成命不可紛更大臣所當信任將該

庫奏計金珠等料俯從部議申信詔旨一以昭

陛下之儉德一以全 朝廷之大信其大監崔敏童惑
聖心罪在不宥伏乞 速行罷斥楊憲諸臣仍乞 天語
嚴切戒諭使各奉公守法仰承 德意凡 明詔所在除
革者不許妄計阻撓以遂覬覦今後內臣凡有奏 請悉
付所司參詳可否既而該部執奏斷在必行敢有徑請
內批欲遂奸計者即係欺罔并聽該科糾劾重治如此則
命令盡一 朝政肅清雖有權奸不敢欺蔽矣

廣聽納隆委任以登治化疏

周鄧

伏惟 陛下自臨御以來宵旰忘疲形神兩瘁可謂有前
代帝王圖治之勤有前代帝王望治之切是固宜任直亮
為耳目以擴其聰明任老成為腹心以資其謨畫斯固適
治之大端大本也夫何比來臣工論事連章累疏殆無虛
日而一切漫不加省即此豈 宗廟社稷之福太平有道
之象哉臣請撮其甚者言之頃 陛下有命欲為都督同
知陳萬言蓋造房第節該科道等官余璿等言之尚書等
官趙廣等言之 陛下皆一切不省豈以諸臣指萬言為
苛貨將沽直以自賢耶昔漢田蚡以外戚請考工地以益

宅武帝怒曰君何不遂取武庫後乃稍退君子猶譏其縱之於始而徒懲創於後也今萬言所占之恩庇非一所給之地宅不貲亦足以敦肺腑之親矣乃以公私俱困之際又欲驅既罷之民於工築之間以滋其窮奢極靡之欲不幾於以飽食餽子者耶臣於此未解諸臣之言果不可聽也頃陛下以主事羅洪載妄撻錦衣百戶因下之鎮撫司獄節該科道等官劉濟等言之尚書等官林俊孫交等言之陛下皆一切不省豈以諸臣與洪載同臭味故朋黨以相庇也昔高歡謂鮮卑曰漢人是汝奴男為汝耕婦為汝織汝何故凌之又謂漢人曰鮮卑是汝作家為汝擊

故族之君子謂高歡偽醜雖不足語蕩蕩平平之
道亦稍有蕩蕩平平之餘風也今洪載所犯特愚戇之過
所坐非重大之條固不足以赫雷電之威矣乃以傳類飲
恨之餘畀之以所願甘心之人於羅織之內以為責報取
償之地不幾於以膏沃助薪者耶臣於此亦未解諸臣之
言果不可聽也頃 陛下以左右闕監之請屢於 宮闈
之內為齋醮之舉隨該給事中張嵩言之不報又該大學
士楊廷和等言之亦徒被 優答未見 明賜施行豈以
諸臣類儒生緣飾經義不能助 陛下求福田利澤之美
耶昔舜命重黎絕地天通漢文帝詔天下祝釐皆不得歸

福於上而舜文卒為賢聖其後世亦皆引長不替至如崇
奉二氏如梁武帝宋徽宗皆覆轍可按柰之何復効之耶
臣於此亦未解諸臣之言果不可聽也然此特聽納之失
也昔魏少府楊阜欲上疏省官人召御府吏問後官人數
吏曰禁密不得宣露阜杖之且曰國家不與九卿為密而
與此等為密乎帝聞愈憚君子亦以為知言今廷和等皆
以卿輔之職上兼師保之重固宜使之造膝承弼相與都
俞吁咈於無間也今陛下於宮闈齋醮一事徒使閹豎
陰柄其議而廷和等既不得與聞於始又不得幹旋於終
則陛下非與此輩為密而於廷和等疏乎唐李德裕論

致理之要以爲常令政事皆出中書則天下何憂不理此
正端本之論也今內閣以代言論思之地即古之中書
不異也而陛下一切處分內閣或不預於票擬而閣
監檢小時得恣其竊弄則政事非出於多門是又委任之
失如此伏望陛下留神聽納以達群情凡前項諸臣奏
議一切早賜施行毋固於偏私毋怵於欺誕務使天下
拭目以觀維新之美仍望陛下留神委任以崇政本凡
一政令必付之內閣票擬而以宸斷主之凡二三左
右皆不得睥睨掣肘於其間如此則聰明不至於壅蔽
政柄不至於下移而祖宗重熙累洽之盛不難復矣

一法令以全治體疏

余瓚

照得先該 欽天監官葉湘等題稱窮詣 清寧宮後被
災處所看得方位有礙不宜蓋造節奉 欽依着該衙門
預備物料修理該工部議各處財竭民困奏派物料恐非
所堪要將沒官房屋高整者量留數處以備將來別用其
餘變賣價銀以備修理題奉 聖旨是沒官房屋變賣價
銀都准你部裏收貯以備修理之用欽此近該司禮監傳
奉 聖旨東城思城坊把抬巷東首犯人錢寧房屋一所
賞與皇親邵茂住阜城門大街北犯人廖鵬房屋西二所
賞與皇親邵輔等住坐東一所并街南房屋俱賞與奶子

劉氏住該衙門知道欽此隨該工部題稱各處高整房屋
節經奉 旨賞賜 皇親蔣輪蔣山蔣壽蔣恭邵喜昌國
夫人訖止有錢寧廖鵬數處見今 大婚禮在邇將來
三宮戚畹例該賞給房屋創造一舉不堪傷勞派行天下
豈能濟急查得犯人數內王璫江彬王準三所亦頗相應
合無分給 皇親邵茂等居住所有錢寧等房屋仍存留
以備後來 三宮戚畹賞給等因奉 聖旨已有旨了欽
此臣等愚昧不知所云果准工部所議量留以備將來別
用之 旨乎抑且變賣價銀收貯以備修理小宮之 旨
乎或如司禮監所傳賞與 皇親邵茂等居住之謂乎

覆恩惟莫知所指竊惟信者君之大寶昔齊桓晉文區區
霸國亦知以信自守卒成其業况天子君臨萬方政令
之出朝更夕改天下臣民將何以適從哉陛下天資英
睿問學夙成法祖意專求治心切臣等固思必不為此也
邵茂等垂誕甲第萌覲覲之心鼓動宮闈為求索之舉
而陛下篤念懿親重違慈訓遂不顧前旨而有此
傳奉也夫邵茂等戚屬之疎遠人品之賢愚與夫劉氏阿
保之恩臣等不知其詳固未敢泛論也但邵茂等叨濫
皇恩依承餘蔭已四十餘年矣非不知累朝憲章也乃
乘時射利鑽刺之謀徒知棟宇連雲可愛也獨不念被灾

賢妃各號房依住之吉乎徒知 皇親戚畹可得也獨不
體將來 三宮戚畹將何以給賜乎徒知以一己之私欲
可飽也獨不思 朝廷之大信不可以不守乎爰自正德
以來姦黨相繼弄權 先帝又加巡幸天下之民敲骨瀝
髓已不堪命矣幸而 陛下起自 興藩入承大統中外
臣民所以仰望 陛下者何如皆以為堯舜可期而三代
以下中主不足論也雍熙可待而漢唐以來小康不足論
也今 陛下臨御幾年矣天下塗炭者未起呻吟者未息
邊方警報殆無虛日軍士缺糧動踰數里關譟之間言及
廼撫白日之內搶劫都城 陛下試思之以為天下果難

熙乎抑小康乎況近日以來火災屢起黃霧四塞人無
馬變不虛生此蓋陛下聰明仁孝有賴治之心故天
心仁愛孳孳災異以譴告之也而陛下所以荅之者何
如詔書已下冒濫革矣而今日所陞者藩邸之牧圉
也明日所陞者藩邸之廝徒也是冒濫可革而獨不革
於藩邸舊人矣傳乞罷矣今日所賞者皇親之莊田也
明日所賞者皇親之房屋也傳乞可能而獨不能於將
郤數家矣蓋陛下之在與府則與府之人同陛下之
人也今日君臨天下則天下臣工孰非陛下之手足
乎天下人民孰非陛下之赤子乎自陛下一身而言

則邵蔣之家固 陛下之親也 祖宗列聖而言則
先朝戚畹孰非 陛下之至親乎 天下各王孰非 陛下
之骨肉乎 今天下之困窮已極而饑寒餓殍皆誠不知其
幾也不聞有實惠之加而所加惠者惟藩邸之人 九廟
之神靈在天而子孫蕃衍又不知其幾也未聞有存恤之
典而所賞賚者惟蔣邵之家夫臣民所以仰望者如彼
上天所以譴告者如彼而 陛下所以答之者如此災異
可息乎否也 陛下反而思之將以為何如天下後世又
將以為何如其於 新政能無少累耶該科所以晝夜
思屏心竭慮勤勤懇懇不避煩瀆為 陛下開陳者正欲

陛下撫安生民轉災為福為堯舜之主雍熙之治也而
陛下聞之如石投水乃曰已有旨了臣等待罪該科莫知
所謂不敢緘默冒昧上言伏望陛下留神省察覽狂
瞽之言以天變為當畏以民困為當恤以祖宗創業之
艱為當念以天下之神器為當惜以心制事以義割恩將
前所賜皇親邵喜等房屋量加裁省分給邵茂等居住
將錢寧廖鵬房屋特降綸音依該部所議明示存留
以備將來別用仍戒諭邵茂等毋入下人之言毋聳宮
闈之聽安靖保身共享嘉靖之休必不得已只如該部所
議將王璵等房屋量為給撥仍乞勅司禮監以後凡有

當行事件務下 內閣及該部詳議可否奏 請施行
得傳奉以箝人口庶法度畫一而治體可全私恩杜絕而
新政可隆矣

戒逸豫以光 聖德疏

高世魁

臣考周公無逸篇商王中宗嚴恭寅畏天命自度治民祗懼不敢荒寧高宗嘉靖殷邦至于小大無時或怨周文王自朝至於日中曷不遑暇食用咸和萬民不敢盤于遊田以庶邦惟正之供故皆享國長久自祖甲以後立王生則逸不知稼穡之艱難不聞小人之勞惟耽樂之從因罔或克壽始知儆戒者帝王保治之心逸豫者世主危亡之漸也仰惟 皇上臨御以來早 朝勤政日講勤學敬事神祇孝享 宗廟凝神淵默端拱 深宮一念勤慎雖古帝王亦不是過近者孝奉 兩宮觀騎泛舟昨又欲以端

陽令節看標 錫宴雖率由舊典自能樽節但臣有意外
之慮 請為 陛下陳之臣聞舜造漆器諫者十餘人夫
舜以大聖人處雍熙太和之盛漆器細物若無害也而諫
者猶恐其為侈靡之漸至於十人而不止當時不以為迂
益彰舜德之高明今 陛下之德無愧于舜近日有此二
舉其將以為逸樂之漸臣待罪言官豈容緘默以自愧于
舜庭之十臣乎然此實非出于 陛下之本心也左右必
有援 先朝故事請者否則豈能遽移 聖心乎日勤慎
之素樂聽而勇從耶蓋 謨訓功烈盡善盡美者 祖
宗精神心術之所在也萬代如見固 聖子神孫繼之

孝其或因時成事行於昔而泥于今者亦當通其變而使
民宜之也臣近觀 旨意輒引故事如鎮守鄧文之換

勅則曰這勅原是先朝舊規如太監張忠之乞陞官臣則
曰這陞官授職亦依倣先 朝事例則皆近習附會欺

陛下以濟其私 陛下已入其機而不悟矣臣恐自茲以

往巧立機關旁引故事以誘 陛下于嬉于遊于畋于荒

于聲色于貨利于土木于滯巧于紛更者接踵至也臣不慮

陛下無悅心之物而慮 陛下有為物所累之心矣臣觀

正德初年 先帝未有闕德特因左右一二小人之誘日

漸月化率流蕩忘返不可收拾 先帝初心未嘗其至此

也始而漸漸而化化而成矣尤物迷人逸樂蕩性誠可畏也誠可惧也殷鑒不遠可不加之意哉且陛下以為今日之治與舜之時何如在朝之臣果如九官之相讓乎在外之臣果如百工之允釐乎內之九州果皆康衢之民乎外之四夷果皆有而之格乎十六相果盡舉四凶果盡除庶績果咸熙四靈果畢至乎臣竊以為未也方今之時正虞廷君臣更相戒飭之日詎可謂天下盡已無事天位信爾可樂乎哉伏願陛下存雖休勿休之心嚴無逸乃逸之戒慎起居以節嗜慾疎近昵以親儒臣以義制事以禮制心毋以一日二日可樂而以匹夫匹婦或能勝予

則諂諛之徒自不敢肆面欺之詐如昔日之誤 先皇而
臣于陛下庶幾無愧于士臣之望矣

陳樊端以圖美業疏

張達

竊惟陛下臨御昉二年於茲常思衰朽遽之時汎掃紛
更一歸憲度使士風頓回國是大定天心克享臣嘗追
而思之此何等精明何等氣象當時通言者往往以不克
終為戒蓋慮夫令圖難終政成或怠非謂行之未及踰年
而舉措遂漸乖背也臣歷觀史傳自古人君善始者多克
終者寡不暇具數如周穆王唐太宗皆新致太平而卒之
為後世嘆息者然猶服勤幾二十年未有若今日詔墨
未乾而渙汗隨反治效未臻而弊端旋復者也陛下居
常慕遠軼堯舜之上區區周穆王唐太宗顧足異哉方

陛下即位首下詔曰 先朝勵精雖切化理未孚茲欲興
道致治必當革故鼎新故一時號令政事煥然可述不但
如臣前所名狀而已夫何力行未久 新化訖乖事有昨
以為非而今以為是人有昨以為不肖而今以為賢變黑
為白朝令夕改臣實不知其端臣請以今日之事與初
即位異與正德年間甚或有正德年所未有畧舉一二言
之惟 陛下垂聽 先朝嘗建新寺崇佛教矣而今日之
齋醮繁興先朝嘗鑒群小濫傳乞矣而今日之爵賞等施
先朝嘗頒內降遺政本矣今日事之不關於宰執者非一
也 先朝嘗棄法司賂大獄矣今日法之不行於貴近者

非一也科道會本而責以奏摺豈獎勵忠言降黜之初心
大臣執法而詰令回詰豈召用此刑者舊之本意至如
崔元封侯將輸巾籠陳萬言乞西安門新宅光朝賢
戚未有若此之恩幸也廖鵬繫獄劉暉得官李隆復差官
就彼勘問先朝罪人未有若此之淹縱也戒鳳守邕未
遑歸嗣今日之外寇多梗也曠徒弄兵毒流諸郡今日
之潢池有儼也四方萬里災傷日聞畿甸股肱來牟絕望
民生無聊過先朝也恒賜肆屠而上示沴天變頻仍過
先朝也凡臣撥拾僅惟疏節其餘蒙蔽陛下背理盡政
禍民虞國未能覩縻縻瀆者猶不知幾伏惟陛下赫然

大奮剛明之威遠覽古今之變行一事必曰吾嘗以此等
為先朝弊政躬親革之矣今何為而復行用一人必曰
吾嘗以此曹為先朝奸人躬親去之矣今何為而復用
退朝之時清閒之燕深惟社稷之圖規恢億萬之計
絕嗜欲之妄使身常強固無以怠惰委政柄勤學問之功
使德常清明無以邪奸竊天機則治何以不若商宗壽何
以不若虞舜彼周穆王唐太宗信不足錄矣不然天下之
事變無窮國家之治亂莫測先朝承孝皇熙洽之
餘今日當正德紛更之後事殊勢異較然甚明陛下為
因循姑息不盡反目前之為臣切未見其可也臣顯謨

惟不能隱默豈不知犯忌諱者負雷霆之誅拾細微者
享富貴之利顧臣今日之所得能幾何而不為陛下陳
之臣不勝惓惓憂惻之至

陳切務以裨 聖治疏

王俊民

臣伏見近日 聖治精明 聖斷果決深快天下之人心
者有數事焉臣姑舉一二事証之如定國公徐光祚奏討
地上已累奉 旨查與人心不無疑慮也續該戶部尚書
奏金帛奏節奉 聖旨這土地着與民照舊管業欽此又
如御史魏有本因申救都督馬永旋被謫降雖累經臣工
論救未蒙 俞允人心亦不無疑慮也續該吏部尚書廖
紀執奏節奉 聖旨魏有本准復原職欽此此二事者
綸音一出人心踴躍稱快臣如此仰窺 陛下有 天地
包涵之量焉有 日月照臨之明焉夫勢已去而終回事

垂成而終止其視前代史冊業已成之業已許之者萬萬
不侔 聖治何精明也 聖斷何果決也是非特泰金廖
紀感愚思奮而已凡中外大小臣工孰不乃心 帝室奮
脩職業以求無負於 陛下也哉臣以為太平之治可計
日而致也臣又因此仰思 聖心於天下之事惟務至當
之歸必不厭臣下之言為煩瀆也臣故舉今日之切於
聖治者四事伏為 皇上陳之如蒙乞 勅該部議擬施
行臣民幸甚天下幸甚 一有小臣之過切見學士豐熙
等謫戍遠方已經累歲禮部尚書唐書奏乞 宥及都督
馬永回話又蒙 聖旨豐熙等朝廷自能從寬赦宥欽此

臣於此仰窺 聖意固欲從寬放還諸臣矣但側聽既久
未蒙慶分乞 勅該部查照前 旨即 賜赦還使諸臣
再覩 天日之明則四海共享雍熙之治矣 一規大臣
之失近該侍郎張聰詹事桂萼攻發大學士費宏過失似
非九官相讓百僚師師之風也節該給事中葛鴻御史張
祿等劾奏伏蒙 陛下而賜優容俱有 溫旨勉留是固
聖明信任大臣畧其細過之至意也但恐此三臣者各懷
忿忌積日愈久積怨愈深而挾私之計多於奉公之心也
是豈 國家之福哉如蒙仍照葛鴻等所奏當罷黜者亟
賜罷黜當罰治者量為罰治或 召之面諭戒以和衷使

三臣無懷忮憾之私則群臣益成協恭之美矣 一重賞
功之器近該 御用監管為已故太監黃英奏乞 恩典
奉 旨黃富等俱授錦衣衛指揮千百戶等官該部該科
累奏裁減未蒙 俞允臣切以為指揮千百戶等職 國
家所以待有功也今以一人之故而陞七八人之眾以賞
功之器而畀諸無寸功之人憊天下立功之心啓後來援
例之患寔出於此伏望 陛下重賞功之器塞無厭之求
仍照該部該科所奏即 賜裁革著之令與永為遵守使
人無望外之思則各奮立功之念矣 一罷不急之工近
該工部奏稱欲先修 仁壽其餘 王德安喜景福等宮

暫停修理又該工科亦奏前事俱未 俞允臣竊惟事有
大小工有緩急夫 仁壽宮者 陛下所以奉養 昭聖
皇太后又出於 章聖皇太后之慈訓事關 皇上孝敬
之大節此工之不可緩者也雖竭天下之財力亦當汲汲
焉為之若夫 玉德等宮則皆在所緩耳今欲一時脩蓋
未免有時絀絀贏之患非 陛下節用愛人之心伏望
俯從該部該科所奏 特勅修蓋 仁壽宮其餘 玉德
等宮暫且停止則財用易給工力易完 皇上孝敬而宮
之盛德益昭著於天下矣

親政權以折奸防亂疏

許相卿

臣惟天下政權必出於一一則治二三則亂上操則治下
擅則亂賢公卿大夫衛翼奉行之則治匪人僭干之則亂
臣嘗稽往迹叅近事以此推之百不失一蓋於今日誦
詔令遡政權切慮深疑殷憂大懼繼之涕泣不能自己
夫天下之變先事言之言必不信且易微禍逮事之至言
又無及臣言官也是以但取及事不敢愛死伏惟仁聖
察愚忠而裁其罪竊觀陛下入繼大統御席未寧登
用耆德嘉納忠讜申赦法守裁抑僥倖竄殛兇邪不旬月
間盡復祖宗之舊可謂明也已矣可謂剛也已矣海內

欣欣引領屈指以期治平曾未再期偏聽私撓秕政垂令
日以益甚殆 陛下明少蔽乎剛少懦乎操權未得其術
而陰伺工移者居中似有人乎臣恐矯誣漸習習實生常
他日矯以踈大臣矯以逐諫士矯以徵玩好矯以興土木
矯以事邊功矯以擅生殺矯以私刑賞將來之禍不可稱
諱雖有智者恐難善其後矣臣為是懼請得舍其細論其
大者崔文左道問 上師臣言之謾答以知道言官交章
勿論也羅洪載守職逮繫秘獄大小臣工䟽十七上而說
不行近又庇崔文之奴奪法司之守罪林俊以違 旨怒
言官之奏擾矣其他事涉中人曲降 溫旨於法有礙則

曰免提問於罪難贖則曰送司禮監奏請發落無力乞贖
則曰與泰錦衣衛百戶然則昔登用者今播棄昔嘉納者
今拂逆昔申救者今沮撓昔裁抑者今牽後此與正德之
初何異而明哲廉直之士雖欲盡節竭忠勢可得乎臣聞
俊將為去計矣俊士望也俊去而俊之類臣知其不能留
矣或復懷祿強顏依阿隱忍與近習私人相表裏以媮歲
月之安幸禍之萬分一於不吾逮者其猷為識趣是亦私
人近習而已矣然則陛下將獨與近習私人共理天下
乎天下且帖然乎臣又必知其不能一日安也夫今之天
下寧堪此輩再敗壞耶譬之人身在武宗時病已阨危

傷生縱欲有旦夕不救之虞然元氣猶壯一劑適中可以立起何也承孝廟之澤也其在今日病雖稍蘇元氣憊甚不必酒色七情百毒攻之也寒燠感節飲食不時遂至長已何也承武宗之禍也故屬精圖治舍已從人庶幾可以望治而況群小竊權紊政以趣之哉亂幾已形臣言今晚矣伏願陛下憬然覺悟收還威柄用大舜勿疑之勇用齊威烹阿之斷取弄權干政尤無良如崔文者勅送法司處之重典以塞人心警其類然後務學親政遠色去讒緩留故老延訪忠言解察民隱官府一體上下一心則德可堯舜治可商周功可祖宗陛下享無疆之

祚群臣與弼諧之榮近習私人亦得以同樂和平矣否則
人心將去天命難枕固陛下之憂亦群臣之羞近習
私人亦非便身之圖也臣實畏之

有言官戢儉士以杜亂階疏

鄭慶雲

臣等近覩 朝報內該禮科給事中劉家勅奏太監崔文亦自行奏辯不數日劉家有調外之命遠近傳聞各相驚歎夫崔文 陛下左右之臣也職宜引 君當道為國惜財顧乃倡興左道蠱惑 聖心虛糜錢糧不可勝計罪彰彰矣劉家為 朝廷耳目之官彈劾是司志在闢邪心存愛 國 陛下不思寬宥獎用調謫若遺是 陛下以崔文一人之故而遂言官塗 國家之耳目拂士大夫之公論壞 祖宗之成法塞天下之言路皆在此一舉矣諺曰教女以潔尚恐不潔而況教之以不潔乎教臣以忠

尚恐不忠而況教之以不忠乎今陛下選用臺諫專以言責之今復以言罪之將見人皆以言為諱自此以後萬一有奸臣逆子竊發不軌以圖危社稷誰復肯為

陛下言乎夫天下之禍恒起幾微慎始防初不可不謹昔武宗皇帝在御之日逆瑾一內臣耳武宗寵之科道官從而論之武宗復從而怒之斥之械繫之在朝之臣動觸禍機舉各緘口閉舌莫敢言其過於是逆瑾徐起挾天子之威權以震動天下之人心基積勢成尾大不掉遂謀篡逆幸賴天祐皇明元惡就擒不然則今日天下之事又不知何如也國家宦官之禍一見於王振再見於

書吉祥三見於逆璫雖奸諂弗逐國非其國矣此

陛下之所知而亦崔文之所謂聞者也臣等謂今日崔文之惡不戢必將與三逆豎同陛下當為國家計崔文亦當自為身家計不然則其臣等所知矣傳曰星星之火易於燎原涓涓之滴易於滔天今乃不知撲塞而後倡起之後將何極夫小人輩之所以竊取權柄擅作威福希圖富貴乞求恩澤旁伺左右垂涎染指回顧却走而不敢竊發者以朝廷有言官在耳恐一遭彈劾罪無所容也今陛下罪一言官則彼小人者驕然而起自以為得計凡可以遂己私圖己利萬一如臣等前所云者無不為之矣彼

將謂此後諫官必不敢言而已不必有所畏憚也如此不
亦可懼可憂也乎臣等又伏覩 陛下登極新詔凡在
先朝有因以言得禍於死者贈官敘廢於廢者叙復起遷
振作士氣開廣言路實 中興第一美事不意一二年間
至此極也況今天變適於上人事垂於下四方饑饉賊盜
生發此正 陛下脩省 召求直言之日柰何復舉動若
是乎伏望 陛下即將劉辰 召回照舊供職崔文早
賜罷斥毋使其惡日深為 國重患且致天下之人窺見
陛下不能容言受諫縱惡長奸親小人而遠君子也 臣
等待罪言官義無嫌避狂愚之言惟 陛下采納焉

慎政令以崇國體疏

劉思賢

臣等於隆慶三年十二月初一日伏見都察院等衙門接到內閣傳奉聖諭近來災異頻仍多因部院政事不調假公營私聽信刁風濫受詞訟誣害平人致傷和氣着廠衛暗訪來奏欽此欽遵臣等仰見陛下遇災知懼保安圖治之盛心也臣等待罪臺端於諸臣政事不調干召災沴不能糾正致煩九重嚴命儆惕有仁臣等愧死無地尚復何言但廠衛暗訪一節實係國體安危不敢不為陛下陳之夫天下之政猶之一身天子元首也輔臣腹心也部院股肱也科道耳目也恭惟祖宗立法以

機務付腹心之臣以幹理付股肱之臣以糾劾付耳目之臣用即弗疑疑即弗用而人主從容高拱鏡鑑自得上焉推赤以御下而下不懼下焉輸赤以奉 上而上不猜一體相成泰象斯舉此時嚴衛之設止於盤詰奸宄譏察非常而官員之賢否政事之得失毫髮不得干預 祖宗之制蓋甚善也後因奸佞肆權創署西廠潛奪 威福流毒縉紳 先帝即位首鑒此弊一洗更新故四十五年以來百司庶府莫有敢欺亦莫有忍欺者相孚相與之情真可以媿都兪吁咈之盛矣設今部院有不能盡職之臣而科道等官不能糾舉在三四輔弼日侍 左右自足備顧

問資 鏡照奚必以咨訪之權付之廠衛哉且訪曰暗訪則事必冥秘恐以是為非以無為有何不可為往日西廠之事可鑒也况廠衛既得以訪部院則部院之位望日輕輔弼之忠憫難達 陛下不惟疑股肱疑耳目且疑腹心矣數者皆疑之所信者獨廠衛耳疑既多則臣下之情阻信既獨則壅蔽之患生此端一萌可為寒膽方今 聖明在上如太陽當中群陰退伏即廠衛諸臣固未必敢私作喜怒仰負 任使然積霜堅氷勢以漸至 陛下以耳目寄之群小群小之中萬一有韋英王莢者鼓煽其間雖使呂強復生而臣等能保其不蹈前轍乎此大小諸臣所以改

觀易聽而不能自安其職業也伏願 皇上推至誠以體
群生 本大公以弘聽納部院政事不調 明加譴責或
令科道等官指實叅 奏下輔臣計議恭候 宸斷其暗
訪一事再乞 聖明酌議應否施行嚴衛諸臣有乘機收
置奸徒妄生事端希張氣燄者仍許臣等訪實叅究則群
疑自釋庶職畢脩 明良交泰實在於斯臣等不勝隕越
祈懇之至

據善端以寬無辜重著舊以保至治跡

陳相

臣聞天下之政不出於一而人君之心惟在所養然養之
之要惟在於善端發見之時擴而充之使用人行政亦莫
不然則施之天下國家無所處而不當矣臣待罪諫員日
者見科道為諫都督陳言言房屋事荷蒙 聖恩免究鴻
臚寺宣讀六科十三道諸臣謝 恩仰窺 聖心聰聽之
下若有人不安者臣以為此 陛下本体之明也又覩昨
者百官早朝侍班天雨驟至 陛下即宣鴻臚寺免其奏
事此 陛下不忍人之心也大小臣工孰不稱慶以為推
此而治于政何有夫何仁心獨見於明廷而天光不照於

聖部臣敢以近日之事數之萬言 欽賜房屋 陛下不
忍之恩也而尚書趙璜因而認罪郎中葉寬率以之繫獄
者為不用恩焉耳陶淳革去管事 陛下本心之明也而
太監芮景時之慰留知府鄭九皋之妄擊者為不用明焉
耳崔文左道亂正王法之所不赦言官交章論劾 陛下
不忍罪之而反忍於奪法司之權遂使耆舊大臣如林俊
者一旦致仕李曇夾帶私鹽律例合當有罪御史累以奏
辯 陛下竟不察之而反惑於聽挾讎之訴以致盡職小
官如程景賢者久禁淹獄尚書百官之表率事體所關非
輕章奏不收不慎今 陛下不白回將話來則曰且不查

况是果敬禮大臣之道耶科道 朝廷之耳目設官以諫
為職風聞不敢不奏今 陛下貶斥加於前罰俸繼於後
是果燭聞言路之道耶臣恐自今以往赫俊去而九卿之
心灰矣葉寬等罪而自司之體解矣耶九臯之被掣則守
牧地方者寒心聲譽實之受誣則盤詰關隘者喪膽天下
臣民以為如此而苟安如此而取敗如此而見賞如此而
受罰其不相率於苟且將就之習者幾希當此之時

陛下高拱穆清之上深居法官之中聲色雜於前便佞諛
於後閹宦弄權而怙勢戚畹恃寵以張威臺閣不得預政
科道不敢盡言 陛下雖有堯舜之資湯武之志必不能

脫正德之余習而成嘉靖之新政矣況今邊方軍餉在在告乏留都民疫家家未保而地震水旱之迭見盜賊重蝗之四出此正上天示戒之意君臣修省之秋也及今不圖末流安救臣若懼罪不言陛下以臣為何如職天下以陛下為何如主而我太祖在天之靈亦不瞑於地下矣伏望皇上推不忍之心擴本明之德在深宮此心也對太廷亦此心也待近臣此心也待遠臣亦此心也覽子忠致曲之言誦孟軻善推之語不溺於聲色不惑於近習誠心任賢虛心納諫慰留林俊以全起用之初心釋放葉寬等以昭天下之公議辨明郭九臯等之寃獄免除李

學者等之罰俸時 親內閣日 御經筵如此則 聰明
不蔽而雍熙之化以臻 聖德日新而堯舜之君可並矣

停工作罷織造以固邦本疏

張漢卿

竊惟衆非元后何戴后非衆罔與守邦君民上下相為一體故民安則國本固而隨以安民危則國本顛而君未有能獨安者古之帝王豈已裕民日慎一日深圖不見之怨所以自為社稷計也近該南京守備等官徐鵬舉等侍郎席書等給事中曾綸等御史梁世驃等各處巡撫都御史李元時何天衢陳鳳梧孟春巡按御史趙光田美鄭元琬黎貫俞集林鉞范永鸞等知府馬曾田賦豐蘭龍誥千貴胡緒宗等衛所指揮等官張勝軍餘許聰等各奏告南北直隸浙江江西河南四川等處地方各被十分重大災傷

亢旱逾時繼以霪雨或在風驟作江湧海溢或時疫流行
闔室病死即今蘇湖淮鳳之間涿水橫流壞民廬舍一望
成湖或依岡附木以居或莖草剝樹以食或鬻鬻子女僅
得二三十錢或鬻一妻僅得銀數錢者甚至無人收買委
之通衢而去抱之投水而死郭門日昇死屍五六十人骸
骨枕藉百里無烟而湖廣地方父子夫婦兄弟貧食無路
一時自縊困窮之極甘就死地豈惟四方近御史盧璠奏
稱畿甸之間隆冬男無完衣婦穿暑布遮道號哭不忍見
聞豈惟畿甸京城通衢委巷乞丐男女數多裸體骨立深
夜號呼雖九重深闕靜亦可徹中官貴戚誰不見聞至

於白晝通都盜賊公行。溝澤淤陷之間。嘯聚已至數千水
勢未消。二麥未種。來夏難望收熟。秋成又未可知。救濟之
策。今已窮。從將來之憂。尤有甚者。頃年各處豐歉。雖或不
同。乃若無一郡不被之災。無一年不災之虞。離析殍亡百
餘年來。未有如此之極也。仰惟 皇上祗畏天戒。勤恤民
隱。特命輔導大臣及部院科道之請。發太倉之金。截歲漕
之粟。不急征徭。一切停止。且責撫按等官。用心賑濟。務使
小民得沾實惠。綸音慷慨。聞者感泣。雖堯禹之心。不是
過也。但惠民之政。方行而屬民之事。已至致 陛下徒有
憂勤之名。小民不蒙 恩惠之實。則為 皇親陳萬言之

營建第宅差大監吳勲等之蘇杭織造勞民傷財可已而不已也且土木營繕不急之務近以災傷奉命一切停止而萬言新宅尤不急之大者則必行而不已雖經該部執奏科道論列未蒙俞允即今深冬寒沍疲勞萬卒焚火呵凍汲汲完美甚至于一木用銀七八十兩畢工之費不知幾百千萬見今工部缺乏錢糧各項物料未免派辦困窮之民豈復堪此且近日多官議賑內帑太倉至無可發之銀多方湊借得二十萬兩萬言之宅其費如彼若移以救民全活何止千萬餘家顧以一時營建百萬生靈之命亦何忍而為此乎况邸報相傳四方災變萬言

亦有人心者乃欽念遂欲恬不辭避又豈萬言之福哉肯
我太祖大內宮殿新成制度不侈喜謂侍臣曰朕夙夜
兢惕弗遑底寧凡有興作必量度再三不獲已而後為之
恐暴殄天物剝傷民財不敢不謹夫太祖之時財力百
倍于今宮殿興作且不敢侈陛下為戚里興作槩不
量時宜而為之可乎臣等以為此大下不可不已者也清軍
刷卷不急之差近以災傷奉命一切停止而內臣織造
之差尤不急之大者則已革而復開雖經科道交章諫止
內閣大臣九卿等官相繼執奏未蒙俞允內外喧呶驚
嘆率謂先年織造中官虐害地方蓋自京畿直抵蘇杭水

陸舟車往來驛驛民間鵲豚索然皆空然隨人等者利為
害不可勝言 詔書裁革實快人心今者群邪競進賄賂
交通左右嬖倖之人蠹蠹然蔽復開前隙 陛下誤從其
請 親批御翰力拒忠言此豈 國家之利哉昔我 太
宗服敝垢之衣語侍臣曰朕雖日十易新衣未嘗無但自
念當惜爾故每澣濯更進因備稱 太祖見 高皇后躬
補緝故喜曰富貴勤儉如此正可為子孫法故常守 先
訓不敢忘夫 祖宗循無恒福實乃家法 陛下正宜恪
守率行崇尚恭儉廼遵信義官非開獎端一擾生靈上累
聖德臣等以為此尤大不可不巳者也况先王一民之饑

則猶已饑之一民寒則猶已寒之今旱沴之災遍於天下
豈止一民之饑寒陛下為民父母忍忽天變棄人言
以興工織造為急萬一字內困窮盜賊駢發未免上厓

宵旰之憂何乃重服飾愛戚畹而忘天下之大計乎邇者
大學士楊廷和等議罷織造陛下廼以具擾執拗拒之
且數奏而意未從夫內閣大臣以輔導為職即古之三公
坐而論道者也一切政務宜與圖可否而後行之今謀議
既不參預至其有言批荅如此豈君臣協心圖治之道乎
昔仁宗賜大學士楊士奇等銀圖書各一其文曰繩愆
糾謬仍俞之曰卿等皆國家舊臣凡政事缺失或群臣

言之朕未允或卿等言之朕不從悉用此印密疏以聞其
毋悻再三言之君臣之間盡誠相與庶幾朝無缺政民無
失所夫 祖宗以繩愆糾謬求匡輔之益 陛下以具
執拘塞忠誠之路以此消 天變召和氣臣等未之聞也
即今奸小并興于內而政治日非災變叠見于外而士民
日苦不圖嘉靖昇平之望顧猶出於正德所未有者乎此
又臣等之深憂也伏願念 天心儆戒之重思下民蕩折
之艱將陳萬言房屋工作暫且停止待豐稔之年再行從
省計議其見差織造人員 俞令內閣不必撰寫 勅書
即 賜停止仍查賣綠囊近幸之人并投幹參隨人等

成 潮建以足邊備見今時漸沔寒土木工作亦難動手
就令做造不無速成不堅虛費錢糧如 聖謨已定工不
可停前籍沒郭勛等家財亦有數萬餘兩見貯 承運庫
乞 勅該庫將前項銀兩發去各工應用其光祿寺戶部
錢糧事難那借如此則 皇上不惟遂祐 國康民之心
而又得安內攘外之道 宗社幸甚天下幸甚臣愚叨竊
中內二十餘年常思一旦溘朝霞填溝壑無以為補報之
地敢因職業所關冒死 上陳伏乞 聖慈特寬斧鉞之
誅 俯賜對非之採臣愚萬死不勝幸甚

緩清收工作跡

劉魁

臣待罪部即近奉本部劄付恭蒙改建祐國康民雷殿委臣管理琉璃窯黑窯做造軌瓦等料工作臣雖庸愚敢不竭力效勞仰稱德意臣前奉部劄內開欽奉

聖諭恭建大高玄殿板房起蓋大字川堂陽德門

登豐門委臣管理兩窯工作做造軌瓦等料前後用過黑鉛紅銅三萬餘斤該價銀一千二百餘兩木柴九百五十餘萬斤該價銀一萬七千七百餘兩土作匠做過六萬七千一百餘工該顧工銀四千六百九十餘萬至埧子土馬牙石煤炸等料雖撥軍機處亦是顧車脚價所費又不知

幾何而黨如此其他木石等項工作更百倍於茲從可知
也以上各工尚俱未完今又有 雷殿之設近該 內官
監會派各作顧匠二千名每日該工食銀一百四十兩顧
夫三千三百名每日該工食銀一百二十餘兩至銅鉛并
木柴等項物料又百倍於茲從可知矣本部因見錢糧無
措題奏暫借光祿寺供用銀兩戶部見貯脚價前來應用
臣思得光祿寺錢糧乃 上用之數戶部錢糧又濟邊之
具豈可那借別用且 廟工未建每切 聖心况厲毒運
年仰廑 聖慮湏是財用充足方克有濟臣愚萬死伏望
皇上將前 雷殿工作暫行停止責令所司各審財用以

通行拏送法司問罪其應用龍衣等項查照該部原議
止行彼處撫按衙門依時督造供用務使不缺永為定法
再不必議差內官以開弊端尤望體祖宗敬天恤民
與其委任大臣之意凡一應事宜務從舊制而與內閣
議擬然後施行其九卿科道凡覆奏執建言等項留神
鑒覽使天下政務一出正大之途左右群小不得抵間請
乞以紊朝廷庶幾君臣之情上下流通和氣可致災變
可消邦本永固矣

慎予奪以全大體疏

雷應龍

臣惟予奪者 朝廷之大體也予所當予則足以勸天下
之善奪所當奪則足以懲天下之惡當予不予當奪不奪
則為予奪失宜予所當奪奪所當予則為予奪顛倒非惟
沮善長奸而 朝廷大體所損非小也臣姑以昨日所見
二事言之吏部為順時令宣治化以彰 聖德事將因誣
劾及言官事議禮致仕降調已故為民充軍尚書等官楊
日等起用寬釋優恤復職緣由擬議上 請無非順

陛下前旨該部看了來說之仁心也云部為遵例報中正
課接濟邊儲減削益引虧陷民商資本乞 恩請給原塩

以蘇商困事將投托勢要報中引塩虛出通關擾壞塩法
奸商李勲等下法司提問從重發遣緣由叅詳上 請無
非將順 陛下前旨照舊例查革再來奏擾重治不饒之
義斷也 陛下正宜充仁義之初心完予奪之大體則何
善之不勸何惡之不懲哉今於吏部之議則 曰罷於戶
部之議則 曰李勲等元送問夫楊目等天下之所謂賢
也李勲等天下之所謂奸也賢者棄而置之奸人遂而有
之不將近於予其所當奪奪其所當予乎二 旨偶同一
日臣已不勝疑愕其何以傳天下示後世也夫三代以後
賢人君子多見謫斥或多不能盡其用而奸偽小人徃徃

得志如楊旦以下諸臣及李勲等似亦無足深惜臣所深惜者朝廷予奪之大體耳況是舉也使楊旦等重增其名李勲等厚固其利而朝廷獨受予奪之失然則臣之此言豈區區為楊旦輩及李勲等謀哉伏望陛下移眷李勲等之心加諸楊旦諸臣移棄楊旦輩之心加諸李勲諸人仍勅吏戶二部將楊旦等生者起用死者存恤將李勲等查革並引仍送法司問罪則予奪適宜喜怒中節朝廷之體不虧而天下之善惡知所勸戒矣

納忠言罷採辦以紓國計疏

詹仰庇

臣惟人君一心攻之者衆非聰明聖智鮮有不為玩好所惑者然責乎悟之早而止之亟也昔仲虺戒湯曰不邇聲色不殖貨利召公戒武王曰玩人喪德玩物喪志夫湯武非不明聖也而仲虺召公猶以不邇不殖喪德喪志戒之惟湯武能受二臣之戒則益絕去玩好之私養其清明之德以為臣民之主至今稱之若夫昏庸之君侈心一生遂不可遏雖有忠臣進戒拒而弗納由茲恣意縱欲財耗民窮欲其保宗社於無疆之休也難矣切見前者勅下戶部買辦珍珠寶石旋即報罷大小臣工無不仰頌聖

德謂能悔之早而止之亟也邇來復有採辦之旨戶部不敢違命廣用價值市之以進而臺諫交章論列臣疑其必溫詞容納決意停止及接聖諭則曰庫內缺珍珠著戶部買些來你每如何這等說姑不究夫陛下以天子之貴四海之富玩好珠石所費無幾臺諫之臣似不當過計以煩瀆聖德也然忠臣愛君必防其漸臺諫之所汲汲不已於言者亦以漸不可長故也今事既往言復不聽臣當將順君德亦何事於言哉然竊謂臺諫未有論議之先陛下玩好之心不能自釋既經諫止之後陛下玩好之心遂當悔悟顧乃不降旨罷免而反曰

妬見死臣恐陛下玩物之心有漸臺諫之言罔聞由此
群小得以乘間投欲四方因以遠索貢獻其弊將有不
可勝言者也臣聞珍珠寶石多藏於中貴之家因陛下
索之愈急則彼臺價愈高珍珠數兩費金數千寶石一顆
值銀數十以有用之國費實無用之玩物果何益哉況
今南北多事之秋正國家財用之際兩厝缺餉跪請
再四當事者尚存根本之慮不敢多與其請而一欲珠
石遂無惜萬金之費是何視土地人民之賤而珠石之貴
也災異荐至男化女形天之所以儆陛下者章章明矣
更宜敦尚節儉痛加修省以答天心可也乃聞災異之疏

略無傲畏復有採辦之命欲其天意眷祐轉災為祥不
可得矣伏乞 陛下以湯武為法 大嘉臺諫之言 明
降傳免之 旨今之既買進者則已若買而未足者則俾
罷之後或有以玩好之物陳之惑 陛下之耳目者必嚴
以斥之如此則心無不正身雖不修誤之於昔猶能改之
於今也上天儆戒之意可答臣民仰望之心可慰矣天下
幸甚臣愚幸甚臣不勝惓惓用知忌諱冒干 天威無任
激切悚懼之至

崇節儉以隆 聖德疏

魏時亮

欽惟 皇上登極至今 節儉之德聞於天下昨隆慶元年十二月內該 內閣傳奉 聖諭戶部未見在庫銀兩若干較幾年用該部以銀數僅較三箇月餘上 聞計一年之內尚欠八九箇月沿邊百萬軍士餽餉無從給發荷蒙 皇上軫念 親灑宸翰 特賜聖旨這銀兩軍糧如何缺乏至此朕於各樣用度上分減省正供之外未嘗妄費分毫你每還宜悉心措處以濟國用欽此大哉 聖謨真 宗社無疆之福四海億萬生靈之福矣何者今天下空虛極矣四海百姓困窮極矣所謂僅較三箇月餘者尚

以太倉銀庫言之若各衙門與各省直之府庫即正支外
求一月之餘積有不可得故昨者 賞邊借之 皇上內
庫銀兩又責差三四御史徧括天下之財以補隆慶元年
蠲免之數尚不敷用我 皇上軫念缺乏至此者但言戶
部之缺乏而尚未知天下之缺乏為尤甚也乃若天下百
姓則啼饑而號寒者徧野流離而輾轉者盈路加以今歲
各處荒旱南自閩浙北自淮鳳西自川峽愁苦怨嘆之狀
在在皆然此真民窮將有盜起之時臣下皆當危懼之日
所在官司欲發倉庫以賑之而在庫無可賑也欲 請內
帑以給之而 內帑無從給也夫民窮莫可為救又若此

我 皇上所尤憫念者故在今日惟仰賴我 皇上之
節儉以開億萬小民之生路耳乃九月二十九日司禮監
傳戶部恭捧 聖諭崑崙貓睛碌寶石珍珠來欽此臣等
伏見傳 聖諭之時舉朝咸謂此當秋防之日我

皇上必憂邊餉不足而 召諭之也此當天下告旱生災
之日我 皇上必憂百姓賑給無措而 召諭之也今
諭之者為買貓睛珠寶等物大小臣民無不驚愕臣等竊
聞聖帝明王不肯異物惟貴安民當此小民不安之日而
貓睛寶石者饑之不可食寒之不可衣所謂異物我
皇上何貴視焉況此異物乃 官中之庫藏所必有者原

自是用矣必責之戶部召買也漢文帝惜白金之費為中
人之產不肯妄費如貓睛者一顆不啻百金千白金之積
千百之生靈膏脂在焉 皇上損此有用之財以買此無
用之物諒 節用愛民之心必大有不忍者矣今一開召
買珠寶之端實深損 皇上節愛之德稍知思愛我 主
敢不為諫止乎祖宗累世節儉相傳自我 聖祖深鑒前
代奢侈之害碎胡元水晶之漏却陳氏鏤金之床有司奏
造 乘輿服御諸物應用飾者皆令以銅為之 曰朕富
有四海豈吝於此然儉約非身先之何以率下開奢汰禍
亂之源未有不由小以至大者 聖祖儉德如是 聖子

神孫世世守之遂使天下富安府庫充足傳至先帝初
年祖宗之庫積厚矣自末年小人欺誑開召買緇賄珠
寶之門以及土木齋醮等費遂致祖宗累世之積費用
盡竭而天下之民力盡疲皇上登極效先帝之初年
除未載之弊政四海之內惟若更生乃今忽傳此諭豈
我皇上節儉之初意哉大小臣工天下萬民不為此一
物惜而為我皇上之節儉聖德惜為府庫空虛百姓
之困窮惜先帝末年費猶可辦以府庫猶未盡空百姓
猶未盡窮也今者國匱極矣民窮極矣萬民仰望
皇上節儉如望時雨臣有人心者孰敢不力贊之先帝

承祖宗富積之後不節儉猶可以支持 皇上繼先
帝虛耗之餘一侈費必難以措處倘有以 先帝末年故
事為 皇上言者乞我 皇上憐念天下府庫百姓不加
罪之必深絕之仍 崇節儉之 聖德焉昨 皇上十分
減省未嘗妄費之 旨出自 親灑宸翰惟時 聖諭一
問吏部朝 覲官一問戶部銀而我 皇上獨於戶部覆
旨特灑 宸翰賜下臣等固仰知 皇上留心節儉已至
真足以動 天地配 祖宗克光 先帝之令德也今猶
睛碌寶石珍珠之買此寧不可節儉寧非 皇上所謂用
度可十分減省者哉寧可謂之正供可以妄費哉 聖謨

洋洋言在人耳天下之民方切傳誦要必永保 聖謨於
恤民乃所以示仁於 聖言乃所以示信於 制用乃所
以示議於 祖宗繼述乃所以示孝後隙之開甚非 國
家之福也且當此 國匱民窮之極又萬萬不堪此者寧
不大可隱憂也哉伏乞 皇上法 祖宗累世之儉念十
分省減之 旨思府庫空虛之極憫百姓窮困之灾仍
賜收回 成命將貓睛珠寶等物一切罷買此後惟一
意專尚儉省以光 帝德以濟時艱永底四海之生大隆
九重之福由是則費用既省府庫漸充天下百姓可安
國家永氣可復久安長治之休可綿之億千萬世而弗替

卷之四

六

矣

罷征邊關商稅以通貨財疏

劉穎

臣切惟國家立制至為精詳祖宗慮惠至為深遠苟可
以利國家安邊徼而無損於生民不貽禍於來世在
祖宗朝當先為之矣有待於今日興利生事之臣哉夫
祖宗立制商貨征稅悉有定規稅其一不稅其二征於彼
不征於此非不慮潰防之費也亦非無所為漫不為之所
也其休國之深慮慮患之至計有非私智邪謀瑣瑣小夫
所能窺測其為聖子神孫萬世帝王基業之慮蓋不淺
淺焉臣嘗稽夫古帝王之治天下所以抑末固本非利其利
也闕譏不征所以禦暴誠不忍病民也我大祖太宗皇帝

有寰宇法古以治內而兩京則有宣課司之設外而府州縣則有稅課局之設魚課有河泊所之設鹽鐵則有場冶之設至於木竹有工部抽分廠之設舟船有戶部鈔關之設其取利於民極為纖悉而周密矣顧於沿邊諸關則未始有商貨之征也 陛下續承丕緒遠追古昔近法

祖宗正德年間添設抽分及 皇店之數凡以病民而罔利者 詔書一切裁革臣有以仰窺 陛下之心即

祖宗之心而 陛下之政一古昔帝王之政天下臣民稽首欣慶其老羸者咸顧道更無死庶幾見 德化之成也 今太監李能不能仰承 德意豈惟治理顧乃陽假修築

邊關之邪謀陰濟漁獵固利之私計欲於山海關抽取往來客商門單使用以備城堡整臺修築之費上以榮感

聖聰使 陛下聽之而無可疑下以掩蓋公論使天下非之而無可舉事若出於至公心實懷夫規利信有如該部之所奏論者誤蒙 陛下允從其請而亦禁制其弊不許侵欺此 陛下之心雖有在於利國實又惧夫病民真公天下之 盛心也然古人有言曰興一利不如除一害誠使李能之請一出至公而無私有利於國不病夫民臣有知其決不可從也何也夫商賈小民棄父母離妻子涉山海之遠冒關塞之險以負擔石之貨正欲圖錐刀之利以

為生耳且所經過稅務部嚴驗稅抽分輸於官者屢矣今復抽取門單使用幾何而不重病之也此其不可者一也沿邊關塞地方寒苦物產稀少民用不貲未免仰給客商今若又使客商告病則財貨將不通矣財貨不通民用又安所取給哉此其不可者二也又况 祖宗設立邊關止以譏察非常盤詰奸細耳城堡墩臺小有坍塌摘撥軍夫隨時修築其有重大工程不貲費用則兵部奏行工部派辦物料應用素有定處其備慮亦已周矣固不在於剝削小民錐刀之利以為 國家歛怨生禍之胎也此其不可者三也矧財者民之命民之有貨財猶其有脂膏骨髓也

今使剝民之脂膏吮民之骨血以戕賊其命則怨心橫生而禍不可測矣諺曰鳥窮則啄獸窮則搏人窮則變今使激之而生變萬一有如前日妖人之殺主事者起於倉卒夫豈不為國家盛治之累乎此其不可者四也且孟子有曰古之為關也將以禦暴今之為關也將以為暴臣願陛下慎勿蹈其言也臣愚莫識忌諱伏乞陛下重念邊關干係匪輕毋規小利致昧經國之圖亟收戍命勿徇偏私之請則宗社靈長之福天下萬世之幸也惟聖明留神采擇臣不勝欣慶願望之至

停買金寶以昭儉德疏

李已

臣等於本月二十日據戶部接本官選到內承運庫署庫事尚衣監太監崔敏等奏為急缺年例金兩寶石等項事內開貓睛祖母綠珊瑚瑪瑙等項各數目不同欲令戶部作速買進以應該庫緊急關領奉 聖旨戶部知道欽此臣等竊惟財用 國家之首務節儉 人君之美德故古先聖王必加意節省以永保萬世無疆之治我 皇上節儉 天成同符往聖 御臨未幾即 詔令停買珠玉等項臣等嘗伏觀其先年 聖旨有曰朕於各樣用度十分減省正供之外未嘗妄費分毫你每巡宜悉心措處以濟

國用大貳 皇言真 社稷蒼生之幸也矧今二年以來
災沴頻仍稅糧不繼寇盜紛起所在皆然頃聞大同等鎮
警報自右衛以達陽和天城諸處胡馬數十萬絡繹不絕
雖目下未敢長驅而禍機實難遙度此從來未有之事遠
近無不驚駭臣等昨查得太倉老庫並外庫實在銀僅三
百餘萬兩糧僅七百餘萬石且各邊年例尚未全給使今
年幸保無事猶難支持萬一秋高馬肥黠虜深入不知一
應兵馬器械糧餉犒賞何以待之此正 皇上宵衣警惕
之時舉 朝臣子扼腕獻籌之日該監乃欲輕動太倉銀
兩買辦金寶貂裘等項以供一時玩好如 陛下令德先

年詔旨各邊糧餉何哉臣等訪得貓睛祖母綠等物每塊約用銀百兩西珠每顆約用銀二三十兩夫天子至尊無上初不藉此為美有之於陛下何加無之於陛下何損臣等不為財用惜獨不為陛下美德惜不為九邊慮獨不為雲中之然眉慮乎縱或上供之物必不能免陛下亦湏俯念民艱查照祖宗列聖鴻規先帝二十年以前事例酌議多寡量行買辦以崇儉朴以實帑藏以待邊境不時之需臣等職掌所關義不容默故時披瀝肝膽昧死一言之伏願皇上宣召輔臣查問太倉銀數大同虜情思祖宗創業之艱難念閭閻枵腹之

可懼少 賜裁察更降 明旨將該監前項奏買金兩寶
石貓睛祖母綠等物逐一斷自 聖心擬定數目應停者
即令停止應減者即令減去候邊報稍息從容查照施
行後不為例如此則 皇上之儉德益光中外之歡聲愈
茂府庫充足而不匱邊塞有警而無虞億萬年太平之基
端在此矣 宗社幸甚臣等幸甚

崇儉德恤民窮以永圖治安疏

魏時亮

本年九月內我皇上諭買貓睛寶石未幾荷蒙賜罷
中外大小臣民鮮不懽忻踴躍謂我皇上軫念匱乏真
聖主恤民之仁惟懷永圖真聖主節財之義罷珍玩
勤聽納炳離照之明方諭買即停止奮乾剛之斷
聖德傳播如是臣等犬馬愚衷曷克揄揚於萬一也迺
今十二月初七日司禮監仍傳聖諭買各樣寶石珍珠
精碌鑽多寶裝三日要隨該戶部具題節奉諭旨嚴急
不二而足臣等伏聞之易曰何以守位曰人何以聚人曰
財言帝王保守天位在人民而保聚人民在財用古先哲

王珍玩不事異物不貴汲汲焉惟以養百姓節財用為先
所以致治一時施聲萬世載在史冊班班可考也 太祖
高皇帝嘗謂侍臣詹同等曰吾每於宮中無事時輒取孔
子之言觀之如節用而愛人真治國之良規孔子之言萬
世之師又嘗曰珠玉非寶節儉是寶於是却文石御銅器
且教 太子諸王曰前代奢儉不同治亂懸判當記吾言
常存儆戒是以 聖子神孫祚貽萬世無非 太祖之所
留也 皇上登極首罷採買專尚節儉嘗讀 聖旨有曰
朕正供之外未嘗妄費分毫可謂遠邁哲王近法 聖祖
天下百姓何幸焉 宗社臣工何幸焉今者 諭買珠寶

各樣竊料所費不止分毫 皇上儉德寧無少累臣等嘗
聞之節儉必謹乎錙銖侈費率由於玩好犬馬愛 君寧
忍欺負矧昨者貓睛罷買海海內外已傳 令名一旦改
之殊駭觀德左氏有言長國家者非無賄之患無令名之
難以唐玄宗之陋尤能焚珠玉於殿前誇令名於天下說
者謂殿前之焚稍似沽名之過然玄宗令名竟與太宗憲
宗媲美稱曰三宗未必不自沽名之一念起之也短之者
不過謂其儉德不終令名更損我 皇上罷買貓睛諸玩
無沽名之念有令名之實今後有寶石買辦之 諭遐邇
臣民寧不為 皇上之儉德令名惜哉舜造漆器諫者七

人夫漆器用物也造用物且諫則買珠寶等之異物寧忍
於不諫乎此而不諫非以堯舜望我 皇上亦非以舜之
臣自待也況且災變異常人情汹懼一歲之中無論天裂
星殞地震山崩雨豆雨蟲諸怪即近日山西以一男子變
為婦人前此所未聞史冊所不載陽變為陰朕兆匪細

皇上接於目能不儆於心乎長至之後 京師陰霧浹旬
夫春霧則恒有之若冬氣歛藏更值寒雪迺霧連晝夜舉
目蒙晦即其象占尤可深思切懼者蓋今日之天下百姓
困窮盜賊將起官風不正虜患已深 宗室衆貧不可以
為生兩廣危朝不能以保募言及根本竄可痛思 聖主

在上正宵旰明作之時臣工在下正交修共勦之日要必
喜怒刑賞之政務感人心理亂安危之幾輒動睿訪百
官舉職大臣法小臣廉四海更生遠者來近者悅兵戎詰
而神氣張屏翰寧而元氣固庶使天下長治萬世永安此
非所急而速惟珍玩珠寶之崇恐非聖朝美聞也我
皇上節儉聖德性本天成茲者懇乞俯念民窮益光
聖儉將異物罷買明旨再申則聖主聖德愈彰中外
惟呼愈甚即一事一念之間見宗社生靈之福而天下
萬世之治安信有不難於致者是在皇上一轉移之間
而已臣無任殞越瞻望之至

乞省無益之費以昭 聖德疏

雷應龍

近該稽考光祿寺錢糧見有所謂鷹犬肉虫蟻食者計每
歲猪肉一萬六千五百餘斤綠豆扁秫共五千二百餘石
臣竊疑 陛下即位以來謹身節用惟日孜孜未聞有珍
異之好爲耳目之役也今畜養禽獸者所費若是豈以爲
小事不足恤乎夫聖如周武王受一桀之貢似不爲過其
臣召公奭即作誥致戒謂不矜細行終累大德孔子筆之
於書垂訓萬世 陛下豈未嘗念及此乎況今災異連年
民窮財盡前項牲口雜糧多係小民典田產貧子女方能
辦納固不可使糜於禽獸之口又况近因祈寒京城內外

乞食貧民死於凍餒者道路枕藉而莫之能救何忍使無
用之禽獸反得饜食飽於百姓之膏脂也孟軻氏謂庖有
肥肉廐有肥馬民有饑色野有餓殍此率獸而食人也
陛下抑豈未嘗念及此乎逮者言未暇論昔我太祖
高皇帝因句容縣有虎為害遣人捕獲之爇養民間飼之
以犬叅軍宗思顏言其無益太祖即忻然取二虎一
熊皆殺之分其肉以賜百官此誠萬世之所宜法也伏
望陛下念小民輸賦之甚艱察禽獸之無益屏去鷹犬
虫蟻之畜停免肉豆菽粟之供為天下惜財不為玩物而
輕費民財為聖躬全德不為玩物而重累聖德則

聖德之隆將可近 聖祖而並周武矣

重惜事體以正朝廷疏

林俊

近該東廠太監芮景賢受民趙紀詞狀奏奉 欽依差錦

衣衛官校拏解知府郭九臯等來京問理一事已經科道

官連日抗章糾正其失節奉 聖旨未賜允納昨日又奉

聖旨趙紀所告係干人命重情又賊私數多特差官校

拏解來京待解到之日朝廷自有處置你每如何又這等

來說該衙門知道欽此據趙紀告稱因定國公家奏陳土

豪久隱功旧被知府郭九臯問發伊男趙文子充軍仍訐

想九臯并同知張守接受馬甫廣等金銀致死人命等情

臣查得定國公徐光祚於去年實有此奏奉 欽依著撫

按官會同原差科道部屬官選委公正人員審勘明白議處停當來說欽此該巡撫順天等府地方右副都御史孟春巡按監察御史郭同臣與監察御史樊繼祖戶部主事張希尹行委知府郭九臯同知張守定國公奏內事情從公查勘續據該府勘明申稱奸民趙紀違例投獻捏稱馬甫廣等霸占等因已經都御史孟春會同具奏外據今趙紀所告前事則是撫拾原勘官員中間似有依憑城社之迹姦弊顯著法當懲治柰何反開告訐之門遽興拏官之獄况朝廷設官分職自有定制臣下奉法任事各有常守今天下一應詞訟內則從三法司外則從按察司及撫

按衙門

宗以來守為成法况東廠原奉 勅諭責在

緝事專為京城其永平府係直隸地方遠在千里縱干人命賊私自屬彼處撫按衙門東廠委的不應受理又不當輒與 奏聞趙紀縱有冤枉重情自當赴本管上司陳訴若有見監人犯亦合具本奏行法司不應薦赴東廠首告今為景賢昧於事體輒首民詞既以聞之 陛下一時未察不宜付之所司輒差官校拏解今日舉措委於事體非宜且 陛下之言曰待拏解到日朝廷自有處置臣謂朝廷處置亦惟有法而已今拏解之舉已為法外之事臣本見法外行事而可以服天下者也且朝廷行政貴識體要

人主為治宜攬大綱即使郭九臯拏解到日鞠問貪酷是實陛下猶不免以天子之尊下侵有司之事頗類苛察足傷大體設或趙紀所告涉虛九臯收逮而死則虧損聖德孰任其咎今據紀一面之詞未經勘鞫直為不辯而九臯先已褫奪衣冠身就縲紲道路興嗟甚非美事風聞四方人人解體恐非國家待士大夫之道也況此事根因原屬撫按衙門所告情詞牽連人犯頗眾徒使拏解到京終是難與結斷萬一盡屬虛謬於朝廷所損非輕臣愚乞陛下俯垂明察示人至公無主先入之言勿與臣下爭勝特降明旨將知府郭九臯提解永平府聽理將

趙紀所告事情選差刑部錦衣衛官各一員前去會同比
直隸撫按官逐一體勘待勘得郭九臬等賊私是實與人命
果真然後拏解前來處以重典以為天下貪酷官員之戒
實為未晚若趙紀所告事出誣罔則亂法之姦罪在不赦
亦乞 朝廷從重處治用懲頑梗如此則事理不失法令
亦行議論自息朝廷正而人心安矣臣昧冒進言無任隕
越伏惟 陛下留神省察則天下幸甚

大臣終制以植綱常疏

何維栢

臣本月初六日伏讀 聖旨毛伯溫著在院管事臣謂
陛下待大臣可謂至矣然猶有未安者 朝廷舉措大臣
出處天下觀之以為法國史記之以傳後誠不可不慎也
臣以為起復一事關係 國家典章甚重連日揣懼不已
於言伯溫素行臣不盡悉其為御史時在湖廣素有青天
之號 陛下久知其能足以重委故援金革之例起之於
衰經之中 天語叮嚀勢不容緩伯溫感激被 命亦不
敢再辭忍情赴道決期而至蓋實以厚報 陛下而不忍
傷知遇之隆者此時情事實不獲已今者幸賴 聖明感

格之誠停止安南之役六省生靈既各遂安居之願獨伯
溫一人不得以慰孝思之情夫天下未嘗無父母之人也
故三年通制達之貴賤而皆然人子至情雖加一日愈於
已故記曰君子不奪人之親亦不可奪親也伯溫以國
家大事奪情起復猶可言也今既無事矣則當乞恩求
懇終餘服以報父母之懷顧乃延留朝署苟且日月不
能以情事懇求是可謂自奪其親者矣然臣觀伯溫之所
未及陳懇者有二一則感陛下之隆恩已有明旨而
不可遽違一則以衰凶在疚所當諱避而不敢於輕瀆故
隱忍以自徇耳夫諱避乃一時之私情人倫實萬世之常

道故苟含悽於公所內不能以自盡則非所以為子進退
無據外無以稟於君則非所以為臣大節一墮前美盡
棄故臣願陛下保全伯溫之節廣錫爾類之孝責令陳
情乞終禮制臣春間曾閱伯溫陳辭本內云七月二十日
服闋則是守憂之時無幾而報陛下之日甚長也臣願
陛下矜其不得已至情令其暫回原籍以至家之日為
始補養者離疾之時以足三年之制畢事乃起一如常例
如陛下念其遠來不忍遽去不得已暫令移出郭門擇
閒僻之館處之以奉晨夕盡禪而止然後方面拜朝廷
之恩出履臺綱之任是本經以從權誠一舉而兩得則天

下皆知 陛下善以禮導其臣大臣能以禮律其身無為
後世譏誚昔富弼有母喪韓琦言起復非盛世事富公竟
不可奪仁宗卒從其請天下後世咸嘉其君臣賢明共由
是禮而不悖如使伯溫今日果於自奪而不亟請大臣不
以為非小臣不以為言則天下後世謂 陛下聖明之時
猶有此事伯溫之才猶忍為此則胥效成軌循私滅倫將
無所不至矣異日國史演之曰大臣起復自 陛下今日
始矣豈不可深惜哉臣日夕痛心以所關至大一念至誠
不能隱默謹此控陳伏乞 聖明裁斷則伯溫幸甚世道
幸甚不勝殞越祈望之至

之後必皆感 恩思奮以圖報稱將來績效可必其有大
裨補 聖治無疆之休者 宗社幸甚天下幸甚